

# 2016 Churer Schnudergoofa

Fifty Shades of Grey hät damals d'Bündner fasziniert,  
anand uf d'Schnorra geh im Bett, hät sich voll etabliert!  
Dia Welle, dia isch nit vorbi, dass d'Bündner sich lönd quäla,  
meh Masochismus goht jo nid als d'Frau Martullo zwähla.

Will d'Jäger z'wenig Reh und Hirsch für ihn verschossa händ,  
hät z'Khur a Beizer Hirschkpfeffer mit Schwiiffleisch g'schtreckt, am End.  
Au bi däm neua Fleischskandal isch üsers Urteil mild:  
Miar findend das genau wia er, ganz eifach „halb so wild“!

A Briaf vur Schtadt, macht alles klar, liggt vor miar uf am Tisch,  
Zweituusig driissg, das wird das Johr, wo mini Hochzeit isch!  
Im Briaf do sctoht, i hegi jetz, do bin i jo so froh  
für zweituusig und viaradriissg a Krippaplatz überkho

Miar gönnd vu Zit zu Zit go Goofa hüata wäg da Kohla  
das isch afanga huara chillig, khasch di glatt erhoola.  
Schtändig luaga, ob dia Gööf au schlofend, khasch dr schpaara,  
Muasch nu für a paar Sekunda ds W-LAN abafahra!

Dia neu Talentklass z'Khur dia hegi Zualauf, dass es kracht  
drum hät ma döt ab sofort au an Altersgrenza gmacht.  
Das isch natürlü fies, dass eina mit soviel Talent  
wia üsra Heinzli Brand mit einasechzig nümma wänd.

So Fruscht steckt er ganz locker weg - hät sich neu orientiert  
und blitzschnell für ds aabrochna Joohr: drei neu Ziel fixiert:  
Meh suufa, absolut null Sport, kei Zit für d'Silvia!  
Lägg miar, das sind doch z'erscht Mol Ziel, wo er erreicha khaa.

Dia Buuda, wo Viagra macht, hät kürzlich fusioniert  
mit dära wo sit Johra für eu Botox produziert.  
Durch dia Fusion sind d'Sorgafalta weg, das lüchtet ii,  
obwohl d'Verhandlig huara lang und pickelhart seg gsii!

Dr Huonder, dä plöfft umma, dass katholisch sii sich lohni,  
vor allem wenn d' modern wetsch sii, dänn gängis gar nid ohni!  
Das gsäch ma, will a Katholika-Ehepaar, luag aa,  
schu hüt a Frauquota vu fuffzig Prozent müass haa.

Und zudämm hät dä Typ nit alli Nodla an dr Fichta  
und miar khönnd ei Mol meh vu sina Furzidea prichta:  
Dr Tod für Schwuuli ständ ir Bibla, ghörsch na referiara,  
im Bistum Chur würd das dr Personalbestand halbiara.

Jeda füfti Schwizer suufi z'vil, sait ds BAG,  
oft am Arbeitsplatz und das khönn Katastropha geh.  
Wenn Katastropha wörtlich nimmsch, fällt üs drei nu eis ii:  
Muass ds Zentrum vum Problem ds Büro vum Remo Stoffel sii.

A Terrorischt, wo sich in d'Luft jagt, dä isch überzügt,  
dass Allah ihn belohna wird, wenn er gen Himmel flügt.  
72 Jungfara, dia warten döt – adrett!  
Blöd, dass er dänn au so viel Schwiegermüater hät.

Dr neu Beamta-Silo Sinergia khämmi z'tüür,  
vilicht wenss jetz nu d'Hälfti bauh, 's sprechi viil drfür.  
Mir zweita Hälfti vu Beamta wüssends schu wohi,  
dia lagrends eifach in dr zweita Gotthardröra ii.